



Durante fin di siman di festival

FADA ta alerta riba uzo y abuso di droga y alcohol

ORANJESTAD - Fundacion Anti Droga Aruba (FADA) a manda un mensahe cla encuan to peliger di consumo di droga na bispo di e festival cu ta tuma luga durante e fin di siman aki.

Sobella Solognier kende ta trahado preventivo di FADA a haci un peticion pa conscientisa nos comunidad riba e fin di siman druk cu ta cuminsa. Mirando cu lo bay tin diferente tipo di actividad, FADA kier conscientisa y alerta riba uzo y abuso di droga y alcohol. Ta conoci e uzo di droga of combinacion di droga cu alcohol den tipo di actividad asina. El a adverti cu e daño cu e tipo di combinacion aki lo por trece cun'e ta ocasiona te hasta morto di e consumido.

El a bisa cu despues di cierto actividad FADA ta wordo yama pa puntra riba cierto tipo di informacion relaciona

cu caso critico di consumo di droga. E ora ey nan ta constata cu tin uzo y abuso den caso di adiccion. Pero FADA no ta traha riba e tereno aki, ya cu nan tarea ta mas preventivo y conscientisacion. Kiermen kico e droga of alcohol por ocasiona y nan consecucionan den plaso corto of largo.

Extacy of Molly

FADA ta pone atencion riba e famoso "Extacy" of "Molly" cu ta bin den forma di pildo of den forma cristalino di un tablet, y e consecuencia cu e tipo di droga aki tin pa esun cu ta consumi.

Segun e trahado preventivo di FADA, mester tene cuenta cu no ta tur locual e consumido di droga ta haya riba caya ta cosnan cu ta bon traha. Sino cu nan ta droga cu ta wordo manipula dor di otro kimiconan, pero e consumido no ta na altura di dje.

E efectonan ta bay ta dife-

rente ya cu e ta bay duna bo "e gana di uza mas di normal pa bo haya efecto cu bo tin custumber di ta na dje".

El a indica cu den tipo di actividad cu ta tuma luga e fin di siman aki, ta dificil pa bisa pa e hobennan abstene di uza droga. Pero e grandinan cu ta consumi alcohol durante e diferente tipo di actividad aki, FADA ta manda un mensahe pa nan tambe. Nan mester ta mas consciente riba e parti di no bebe y core.

Pa e festival cu ta na caminda aworaki, FADA a wordo acerca dor di e organisadonan mes, pa nan por bin cu un banner na entrada y salida di e festival, pa alerta riba e parti di alcohol y coremento di auto.

E no ta un banner grandi, pero si cu e mensahe cu ora bo bebe percura pa no core auto pa no pone bida di otro na peliger, Sobella Solognier a bisa. □